

ua faaroo mai raua i te mau parau a to tatou peropheta i teie mahana, tei parau mai e, « Aita e tusia rahi atu... no te farii i te mau haamaitairaa o te hiero » (Thomas S. Monson, « Te hiero mo'a—e mori no to te ao nei », *Liahona*, Me 2011, 92).

Ua nana'ohia i ni'a i te hoê pae o te pene o te fenua Peretane teie mau parau, « E ti'a i ni'a i te tapono o te feia rarahi ». Ia haamana'o ana'e au i to tatou mau hui metua pionie faahiahia, te mana'o nei au e, te ti'a nei tatou *paatoa* i ni'a i te tapono o te feia rarahi.

Noa'tu e, na roto mai i te hoê rata na Robert Harris te parau a'o i te tae-
raa mai, te ti'aturi nei au e, e rave rahi mau hui metua o te hapono atoa i te reira huru parau poro'i i ta ratou mau tamarii e te mau mootua : Eiaha tatou e haamo'e i te mau iteraa ta tatou i farii i roto i te hiero, e eiaha tatou e haamo'e i te mau parau fafau e te mau haamaitairaa ta tatou tata'itahi e farii maoti a'e te hiero. A piti, eiaha tatou e haamo'e e, na te hoê peropheta no te Atua e arata'i nei ia tatou.

Te faa'ite papû nei au e, *na* te hoê peropheta a te Atua e arata'i nei ia tatou. Ua faaho'i mai te Fatu i Ta'na Ekalesia i te mau mahana hopea nei na roto i te peropheta Iosepha Semita, e eiaha tatou e haamo'e e, ua arata'i-hia tatou na te hoê ana'iraa peropheta mutu ore na te Atua mai ia Iosepha Semita e tae mai ia Brigham e na roto i te peresideni tata'itahi o te Ekalesia tei mono mai e tae roa mai i to tatou peropheta i teie mahana—Thomas S. Monson. Ua ite au ia'na, te faatura nei au ia'na, e ua here au ia'na. Te faa'ite papû nei au e, o oia te peropheta a te Fatu i ni'a i te fenua nei i teie mahana.

O te hinaaro hohonu o to'u aau, tae noa'tu i to ta'u mau tamarii, e to te mau mootua, ia faatura i te faufaa o to matou mau hui metua parau ti'a—taua mau pionie momoni haapa'o maitai ra tei farii ia tuu i te mau mea atoa i ni'a i te fata no te faatusia e no te paruru i to ratou Atua e to ratou faaroo. Te pure nei au ia ora tatou tata'itahi ma te mau maite i te faaroo ta to tatou mau metua i poihere. Na roto i te 'ioa maitai e te mo'a o Iesu Mesia ra, amene. ■



Na Elder L. Tom Perry

No te Pūpū no te Tino Ahuru ma Piti Aposetolo

Haapa'o na roto i to tatou faaroo rahi

Ua riro te haapa'o ei tapa'o no to tatou faaroo i roto i te paari e te mana o te mana faatere teitei roa a'e, oia ho'i, te Atua

Ua aano ta'ue noa ta maua te tuahine Perry mau pureraa pō utuafare i te mau monire atoa. E haere mai to'u taea'e, ta'na tamahine, to Barbara taea'e e te hoê fetii tamahine e ta'na tane, ua haere mai pauroa ratou e noho i to matou vahi. A tahi ra, mai te tau mai â o to'u vai-tamarii-raa, matou e noho tapiripiri faahou ai e te fetii, e haamaitairaa ho'i te reira no'u. I te matamua ra, ua ora na to'u utuafare i roto i te hoê pû fare tei reira te mau fetii o to'u metua vahine. E mea piri to ratou fare i to matou, o papa ruau Sonne i te pae apato'erau, e o tati Emma i te pae apato'a. I raro rii mai i te pae apato'a, te nohoraa ia o tati Josephine e i te pae hiti'a o te ra, i tera noa pu fare, o « tonton » Alama.

I to'u vai-tamarii-raa, pauroa te mau mahana, e farerei matou i te fetii, e taimete reira no te ohipa amui, no te ha'uti e no te paraparau. Eita e nehenehe e rave rahi roa i te ohipa maa-maa, e tae vave roa ino te parau faa'ite i te metua vahine. E mea taa ê te ao i teie nei—ua parare te rahiraa o te mau utuafare. E mai te peu tei piha'i iho rii ratou i te oraraa, eita'toa e nehenehe e parau e, e mea piri ratou. Atira noa'tu, e au atura ia to'u vai-tamarii-raa e

to'u nei oraraa i teie nei mai te ra'i te huru, tei piha'i iho noa te mau melo utuafare i te tahi e te tahi. E faahaama-na'oraa tamau te reira no'u no te faito mure ore o te utuafare.

A tupu ai au i te paariraa, e auraa taa ê to'u i to'u papa ruau. O vau te tamaroa matahiapo o te utuafare. Na'u e faaateatea i te hiona i ni'a i te haereraa i te tau to'eto'e e na'u atoa e tapu i te aihere i te tau ve'ave'a, i to matou fare, te fare o to'u papa ruau e tae noa'tu te fare o to'u na tati. E parahi noa to'u papa ruau i ni'a i te taupee o to'na fare ia tapu vau i te aihere. Ia oti ta'u ohipa, e parahirahi rii au e o o'na, no te paraparau rii. Ua riro taua mau taimete ra, ei mau haamana'oraa tao'a rahi no'u.

I te hoê mahana ua ani au i to'u papa ruau nahea vau ia ite e, te rave ra anei au i te mea ti'a noa, ua rahi ho'i te mau ma'itiraa i roto i te oraraa. Mai tei matarohia e a'na, ua pahono mai oia na roto i te hoê ohipa no roto mai i te oraraa faaapu.

Ua haapii mai oia ia'u no ni'a i te haapiipiiraa e piti puaahorofenua ia ohipa amui raua. Ua faataa mai oia e, e ti'a i na puaahorofenua ia ite noa e, o vai te raatira pupu. Hoê o te mau taviri no te haapapû i te tape'a-maite-raa



e te arata'iraa i te hoê puaahorofenua, o te mauhaa taamu ia e te tavaha. Ia mana'o noa'tu te hoê o na puaahorofenua e, aita e faufaa e haapa'o i te hinaaro o te taata faahoro, eita roa'tu na puaahorofenua e huti e e ohipa amui atu i te hope o to ratou puai.

E hi'o na tatou i te haapiiraa ta to'u papa ruau i haapii mai i roto i teie hi'oraa. O vai te taata faahoro no teie na puaahorofenua ? Ua ti'aturi to'u papa ruau e, o te Fatu. Tei Ia'na ra te fa e te faanahoraa. O Oia atoa te taata haapiipii e te taata haamanuia i teie pupu puaahorofenua, e i te hopearaa, i te puaahorofenua tata'itahi. Te taata faahoro te mea ite a'e, e hoê noa rave'a no te puaahorofenua ia ite e, te rave ra ona i te mea ti'a, oia ho'i, o te haapa'oraa ia ona e te peeraa i te arata'iraa a te taata faahoro.

Eaha ta to'u papa ruau i faaau i te mauhaa taamu e i te tavaha ? I tera ra tau, mai teie nei atoa ho'i, ua ti'aturi au e, te haapii maira to'u papa ruau ia'u ia pee i te mau muhumuhu a te Varua Maitai. I roto i te hi'oraa o to'na feruriraa, e ohipa pae varua te

mauhaa taamu e te tavaha. Mai te mea e puaahorofenua haapa'o i roto i te hoê pupu tei haapii-maitai-hia, te tahi rii noa hutiraa marû, atira'tu ai, ua rave papû oia mai te au i te hinaaro o te taata faahoro. Teie hutiraa marû nei, mai te reo marû ia e te ha'iha'i a te Fatu ia tatou. No te faatura i to tatou ti'amâraa, e ere roa te reira i te hoê hutiraa puai e te faahepo.

Te tane e te vahine e ore e haapa'o i te mau muhumuhu marû a te Varua, e haapii mai ia ratou, mai te tamaiti puhara, na roto i te mau faahopearaa ohie no te oraraa haapa'o ore e te tai'ata ra. I te taima noa a faahaehaa ai teie mau faahopearaa ohie i te tamaiti puhara ra, to'na atoa ia « iho-faahou-[raa i] to'na iho huru mau » e ua faaroo a'era i te mau muhumuhu a te Varua i te parauraa ia'na e ho'i i te fare o to'na metua tane (hi'o Luka 15:11-32).

E no reira te haapiiraa ta to'u papa ruau i haapii mai, oia ho'i, ia vai ineine noa no te farii i te hutiraa marû a te Varua. Ua haapii mai oia e, e farii noa vau i te reira muhumuhu ia haamata noa'tu vau i te hape i te haerea.

E eita roa vau e harahia i te mau hape rahi atu â mai te peu e vaiho vau i te Varua ia arata'i ia'u e i ta'u mau faaotiraa i roto i to'u oraraa.

Mai tei faa'itehia i roto i te Iakobo 3:3, « Inaha, te tavaha nei tatou i te [puaahorofenua], ia faaroo mai ratou ia tatou, e te tioioi noa nei tatou i to ratou tino atoa ».

E ti'a roa ia tatou ia mana'ona'o maitai i ta tatou tavaha pae varua. Noa'tu e hutiraa marû roa ino na te Fatu, e ti'a roa ia tatou ia vai te aau tae no te tau i to tatou haerea. No te manuia i roto i te oraraa, e ti'a roa ia tatou ia haapii i to tatou varua e i to tatou tino ia ohipa amui no te haapa'o i te mau faauerua a te Atua. E ia faaroo tatou i te mau muhumuhu marû a te Varua Maitai, e riro te reira i te tahoê i to tatou varua e to tatou tino i ni'a i te hoê fa, no te arata'i e no te faaho'i ia tatou i to tatou fare mure ore, no te ora i piha'i iho i to tatou Metua mure ore i te Ao ra.

I roto i ta tatou hiro'a faaroo toru, te haapii nei tatou i te faufaa ia haapa'o : « Te ti'aturi nei matou e, na roto i te



po'ipo'i, teie nei râ, nahea pai ona, e tei pihai iho ia'na o Isaaka, i te haereraa i tera tere toru mahana no te tapae i raro mai i te mou'a Moria ra? Nahea pai raua i te tariraa i te vahie i ni'a i te mou'a? Nahea pai ona i te paturaa i te fata? Nahea pai oia i te ruuruuraa ia Isaaka a faatarava atu ai ia'na i ni'a i te fata? Nahea pai ona i te faa'iteraa ia'na e, o oia te tusia? E no hea mai pai to'na puai no te amuraa i te tipi no te pati'a i ta'na tamaiti? Na te faaroo o Aberahama i haapuai ia'na no te pee haapa'o maitai i te arata'iraa a te Atua, e tae roa'tu i te taime semeio ra i pii ai te melahi ia'na mai te ra'i mai ma te parau e, ua manuia oia i teie tamataraa teimaha mau ta'na. Ei reira ua faahiti faahou â te melahi i te mau parau fafau no te fafauaraa a Aberahama.

Ua ite au e, e riro te mau titauroa no roto mai i te fariiraa i te faaroo ia Iesu Mesia e te haapa'oraa i te haatafifi rahi a'e i te hoê i te tahi. Tau matahiti rahi tei ma'iri i ni'a ia'u, e ua ite au e, ua rau te huru puaahorofenua, e no reira, te vai ra e mea ohie rii a'e ia haapiipii atu, e te vai ra e mea fifi rii a'e, e mea rau atu â ia te huru taata. E tamaiti e aore râ e tamahine tatou tata'itahi na te Atua, e e aamu taa ê iho to tatou, hou i te tahuti nei, e i te tahuti atoa ho'i. No reira, aore re'a rave'a e tano no te taatoaraa. E ua ite papû roa ho'i au i te mau tamataraa e te mau hapehape e tupu i roto i te oraraa, e te mea faufaa atu â, ua ite au i te titauroa tamau i te piti o te parau tumu o te evanelia a Iesu Mesia, oia ho'i te tatarahapa.

Parau mau atoa ho'i, te tau i ora na to'u papa ruau, e tau ohie a'e no te ma'itiraa i rotopu i te maitai e te ino. Te ti'aturi nei te tahi mau taata maramarama e te aravihi e, titauihia te mau rave'a aravihi atu no teie tau fifi to tatou, aita roa'tu vau e ti'aturi nei i te reira. Te feruri nei râ vau e, e rave'a ohie a'e te titauihia no teie tau fifi, mai te pahonora a to'u papa ruau ia'u i to'u aniraa ia'na e nahea ia ite i te taa'eraa i rotopu i te maitai e te ino. Ua ite au e, e faahitiraa ohie ta'u no outou i teie mahana. Peneia'e eita te reira e haere no te mau taata atoa, e nehenehe râ ta'u e faa'ite atu ia outou

Taraehara a te Mesia e ti'a ai i te taata atoa ia faaorahia, na roro i te haapa'oraa i te mau ture e te mau oro'a o te Evanelia ».

I roto i te huru haapa'o ta to'u papa ruau i faahoho'a e na puaahorofenua, titau-atoa-hia i te tahi ti'aturiraa taa ê—oia ho'i, e ti'a ia vai te faaroo papû i roto i te taata faahoro. E no reira, e tu'atiraa atoa to teie haapiiraa a to'u papa ruau i te parau tumu matamua o te evanelia—te faaroo ia Iesu Mesia.

Ua haapii te aposetolo Paulo e, « E teie nei, o te faaroo nei, o te ti'aturi ia i te mau mea e tia'ihia nei, e te ite i te mau mea aore e hi'ohia nei » (Hebera 11:1). Ei reira, ua faa'ohipa Paulo i te hi'oraa o Abela, Enoka, Noa e Aberahama no te haapii mai no ni'a i te faaroo. Ua faaea oia i ni'a i te aamu no Aberahama, no te mea o Aberahama te metua no te feia faaroo :

« No te faaroo i haapa'o ai Aberahama, a parau hia mai ai oia e, e haere i te hoê vahie e noaa mai ia'na a muri atu ei ai'a ; e haere atura oia ma te ite ore i taua fenua i haerehia e ana ra.

« No te faaroo i purutia noa'i oia i taua fenua i parauhia maira, mai te mea e, e fenua ê ra... »

« No te faaroo atoa i noaa'i ia Sara iho te maitai i tô ai ra, e fanau maira ta'na tamaiti, hope noa'i to'na tau mau ra, no te mea, i mana'o oia e e parau mau ta'na ta tei parau maira » (Hebera 11:8–9, 11).

Ua ite tatou e, na roto i te tamaiti a Aberahama e o Sara, o Isaaka, ua horo'ahia ia Aberahama e ia Sara—te parau fafau no te huaai « mai te feti'a o te ra'i ra te rahi, e mai te one tahatai eita e hope ia tatau ra » (hi'o te irava 12; hi'o atoa Genese 17:15–16). Ei reira, ua tamatahia to Aberahama ra faaroo, i te hoê faito eita e roaa i te rahiraa o tatou ia feruri.

E rave rahi taime to'u hi'oraa i te aamu no te Aberahama e Isaaka, e tae roa mai i teie mahana, aita vau e mana'o ra e, ua haro'aro'a pauroa vau i te faaroo rahi e te haapa'o o Aberahama. E nehenehe paha ta'u e feruri ia'na i te faaineineraa, ma te faaroo rahi, no te reva atu i tera ra

e, ua haere te reira no'u. Te tuu atu nei au i te reira i mua ia outou ma te tuu atoa'tu i te opuaraa ia tamata outou i ta'u mau parau, e ia na reira outou, te parau fafau atu nei au e, e riro te reira i te arata'i ia outou i te ma'itiraa maramarama a topahia ai outou i te mau ma'itiraa rau, e e riro atoa te reira i te arata'i ia outou i te mau pahonoraahie i mua i te mau uiraa e faaa-repurepu nei i te taata ite e te feia te mana'o nei ia ratou ei taata paari.

Pinepine roa tatou i te feruri i te haapa'o, mai te pee-afaro-noa-raa i te mau parau faaue e aore râ te mau parau faahepo a te mana faatere i ni'a a'e ia tatou. Te parau mau râ, i to'na faito maitai roa a'e, ua riro te haapa'o ei tapa'o no to tatou faaroo i roto i te paari e te mana o te mana faatere teitei roa a'e, oia ho'i, te Atua. A faa'ite ai Aberahama i to'na faaroo rahi e te aueue ore e to'na haapa'o i te Atua, e noa'tu e, ua faauehia oia ia faatusia i ta'na tamaiti, ua faaora te Atua ia'na. Mai te reira atoa ia no tatou, ia faa'ite atu tatou i to tatou faaroo rahi na roto i te haapa'o, e faaora mai te Atua ia tatou i te pae hopea.

Ratou te turu'i noa nei i ni'a ia ratou iho ma te pee noa i to ratou mau hinaaro e to ratou mau hiaai, e oti'a rahi ia tei mua ia ratou ia faaau-hia i te feia e pee nei i te Atua e o te fana'o nei i To'na mana'o, To'na mana e Ta'na mau horo'a. Te parauhia nei e, « Te taata tei puohuhia ia'na ana'e iho, e pu'ohu na'ina'i roa ia te oti mai ». E ere roa'tu ia te haapa'o ma te puai e te rohi itoito i te ohipa paruparu e te faaea noa. E ma'itiraa te reira i rotopu i to tatou ite e to tatou mana taoti'a, e te paari e te puai rau taoti'a ore a te Atua. Ia au i te haapiiraa a to'u papa ruau, e ma'itiraa te iteraa i te tavaha pae varua i roto i to tatou vaha e te peeraa i te arata'iraa a te taata faahoro.

Ia riro mai tatou ei taata ai'a no te fafauraa e te huero o Aberahama na roto i to tatou faaroo rahi e na roto i te fariiraa i te mau oro'a o te evanelia tei faaho'i-faahou-hia mai. Te parau fafau nei au ia outou e, ua matara noa te mau haamaitiraa o te ora mure ore i te taata faaroo rahi e te haapa'o. Na roto i te i'oa o Iesu Mesia, amene. ■



Na Elder Lawrence E. Corbridge
No te Hitu Ahuru

Te peropheta Iosepha Semita

Na te mau heheuraa i manihia i ni'a ia Iosepha Semita e haapapû nei e, e peropheta oia na te Atua.

Te Orama Matamua

Ua tai'o te hoê tamaiti iti i te Bibilia, e ua haru mai to'na mata i te hoê irava papa'iraa mo'a. E taimeteie o te tau i te ao nei.

Ua pe'ape'a rahi oia ia itehia mai ia'na te ekalesia e nehenehe e arata'i ia'na i te parau mau e i te faaoraraa. Ua tamata oia i te mau mea atoa, e i teie nei, ua hi'o oia i roto i te Bibilia ma te tai'o i teie mau parau: « Te ere

ra râ te hoê o outou i te ite, e ani oia i te Atua ra, o tei horo'a hua mai i te maitai i te taata'toa ra, ma te pato'i ore ; e e horo'ahia mai ta'na ».¹

Ua feruriruri oia i te reira, faahou e faahou â. E maramarama iti te hiti maira i roto i te poiri. O teie anei te pahonoraahie, te e'a e mahuti mai i rapae i te ahuehue e te poiri? Atae ho'i ohipa ohie? E ani noa i te Atua e e pahonohia mai? I te hopearaa, ua faaoti oia e ani i te Atua e aita ana'e, e faaea noa ia i roto i te poiri e te ahuehue.

E teie râ, noa'tu â to'na pe'ape'a iti rahi, aita oia i horo noa i te hoê vahi a faahiti ru noa'tu ai i ta'na pure. E 14 matahiti noa to'na, e noa'tu to'na hinaaro rahi ia ite, aita oia i ru noa. E ere ho'i te reira i te hoê noa pure iho. Ua faaoti oia i te vahi e i te taimeteie no te tamata. Ua faaineine oia no te paraparau i te Atua.

E, tae mai nei taua mahana ra. E po'ipo'i nehenehe e te maramarama, i te omuaraa o te tau faatupuraa raau i te matahiti [1820].² Ua haere oia, ona ana'e, i roto i te hau o te hoê uru raau fatata i te fare, i raro ae i te marû o te mau tumu raau e hi'o mai nei ia'na. Ua tae oia i te vahi ta'na i faaoti ia haere. Ua tuturi i raro e ua pûpû i te hiaai o to'na aau.

